

太子慕魄經

後漢安息三藏法師安世高譯

聞如是一時佛在舍衛國祇洹阿難邠坻阿藍時佛語諸比丘我身宿命爲波羅奈國王作太子名曰慕魄始生有異顏貌端正絕無雙比自識宿命無數劫事所更善惡罪福受報壽夭好醜沒此生彼所從來生皆悉知見年十三歲閉口不言王唯有此一子耳舉國人民皆重愛之當繼後嗣襲續王位然以追識宿命憶載存亡禍福故質不語至十三歲捐棄形骸志存虛無凜凜不說飢寒恬愜質朴意如枯木雖有耳目不存視聽智慮雖遠如無心志不畏汙辱亦無憎愛若盲若聾不說西東狀如矇矓不與人同父王憂慮甚用患苦深恥隣國恐見凌嗤因呼國中諸婆羅

門問之此子何故不能言語乎婆羅門相視言此子惡人也雖面目端正姝好內懷不親觀相默默欲害父母危國滅宗將至不久不可畜養旣不能語當何益於王耶令王了不復生子者皆是惡子所防固也是使大王不復生子耳王宜棄捐當生埋之爾乃王身可全保國安宗然後更得生貴子耳不者甚危王信狂愚謂爲審然即用愁憂坐起不寧妓樂不御服美不甘則與長者大臣共議之云當如之何或有臣言遠棄深山無人之處或有臣言投沉深水有一臣言當如師語但作深坑傍入如室給與資糧侍以五僕生置其中從命所如空刃絕之爲王即隨此臣所言即晨遣僕故出埋之太子心內悲感傷其愚惑矜愍無量其母憐哀心爲傷絕言我無相

深五

二十

生子薄命乃值此殃痛斷我腸哽咽涕泣悲  
懷嗷嗷感戀靡逮事不得已俛仰放捨遣人  
載出當埋棄之悉取太子所有衣被瓔珞珠  
寶皆用送之僕使於外盡脫取其衣被珠寶  
持著一面因共作坑作坑未竟慕魄獨於車  
上深自思惟心與口語今王以下及諸人民  
皆共謂我爲審聾癡瘖不能語也吾所以不  
語者正欲捨世緣安身避惱濟神離苦耳今  
反當爲誑詐所危旣沒身命陷墮彼人便默  
自取衣被珠寶持去作坑人輩不覺慕魄取  
物去時慕魄則到水邊淨自洗浴以香塗身  
悉取衣被瓔珞著之到坑問曰作坑何施其  
僕對曰國王有子名曰慕魄瘖瘖聾癡年十  
三歲不能言語王問婆羅門婆羅門師自言  
當生理之爾乃安吉全國榮宗利後子孫以

用是故我等作坑欲埋慕魄慕魄即曰我即  
是太子慕魄也人即驚悚衣毛爲豎馳走往  
趣視其車上不見慕魄還至坑所諦熟觀察  
聽聞言語絕有異聲光景如月世所希聞動  
其左右行者爲止坐者爲起飛鳥走獸皆來  
會聚伏太子前聽太子語慕魄又曰觀我手  
足察我形容云何群迷誑詐所惑以謬爲諦  
生相捐棄發意所陳言成文章左右惶敬已  
感惶露上合下同靡不順從其儀大惶征營  
悚慄兩兩相視面目並青咸曰太子甚神乃  
如是也皆前作禮叩頭求哀願赦我罪共還  
入宮到父王所慕魄曰今已見棄不宜復還  
也汝徑自往白王令知僕即奔馳白王如是  
其母哀傷使人問狀僕曰太子甚神開口一  
言真驚恐人聞者皆擾行者滿道王則愕然

且喜且悲深怪所以王與夫人便共驂駕往迎太子國民大小莫不馳動觀瞻滿道咸曰太子類如欲見神形王未到頃慕魄心即自念當學道耳適發此意天帝釋即爲化作園觀浴池衆果樹木快樂無比慕魄即便脫去著身好衣珠寶轉作道人被服儼然王前欲到逢見慕魄在樹下坐慕魄見王來到即起迎逆王爲作禮慕魄則曰大王就坐王聞慕魄語言音聲威神光景震動天地絕無雙比即大歡喜便曉慕魄共還入國居位理政吾請避退慕魄曰不可不可我以畏馱地獄勤苦愁毒萬端吾昔曾更作此國王名曰須念以正法治國奉行諸善二十五年鞭杖不行刀兵不設牢獄無繫者惠施仁愛恩流德布救濟窮乏無所貪惜雖有此行猶犯微闕終

墮地獄六萬餘歲蒸煮剝裂痛酷難忍求死不得欲生不得當爾之時父母在處雖有資財億載無數富而且貴快樂無極寧能知我在彼地獄拷治劇乎豈復能來分取我身苦痛不也我所以墮罪者何往昔作此大國王時小國王附庸諸域皆悉統屬亦五王性慈仁其德至淳法令不嚴諸小國王皆輕慢易咸共謀議今此大王謹善輒弱威禁不攝德不堪任統御大國當共征伐廢退之耳即舉兵衆來攻大國時王須念逆以珍奇財寶皆賜遺之復以重官厚祿撫順慰諭誘而安之即皆止息各還本國如是未久復來攻伐數數非一大國群僚咸共瞋恚上白大王諸小臣國愚戇無義不慮罪釁數爲慢突造成悖逆觸犯尊上令騷擾驚怖不息當應誅討以除寇

害王曰爲民父母當務仁化恕已育物危命濟衆彼猶嬰孩愍其無識以漸誘導不忍加害也王懷弘慈普哀物命永無誅伐之心群臣不忍數爲屬城小國所見凌易忿不顧難竊私舉兵討伐諸國即大殘殺人民大王聞之甚用悲痛爲之雨淚皆爲諸國死亡人民持服猶喪其子矜愍無極諸小國王見大國王慈心矜念人民乃爾即皆降伏來歸附之其來歸附者大王則爲施設厨饌大官設饌皆須烹殺牛羊六畜以具衆味烹宰之時輒當先白王心雖慈事不獲已領頭可之緣是得罪勤苦如是每一念之心甚懷寒衣毛爲豎身體則爲虛冷汗出我所以不語者追憶過世所更吉凶安危成敗恐復與會故結舌不語至十三歲冀以靜默免瑕脫穢出度塵

勞永辭於俗不與厄會適復念欲閉口不語而當爲王所見生埋恐王後時復得是殃一入地獄無有出期我意不欲令王得罪故復語耳徒欲爲道守意無爲不樂爲王也人居世間恍惚若夢室家歡娛須臾間耳計命無幾憂畏延長樂少苦多衆惱萬端是以智者以國財寶恩愛爲累衆欲爲塵使我爲王當復憍汰貪求快意令民憂煩爲天下之大患也故欲除憂棄離塵累反流索原拯濟未度生世如寄無一可怙年衰歲移老命促疾不可選輒去道日遠不貪富貴不重珍寶棄捐世榮思想大道高翔遠逝自濟於世父王曰當那可爾汝爲智者當原不及不可便爾故棄我去王心悲喜深悔所爲太子復曰何聞父子生而相棄恩愛已乖骨肉已離爲行已

愆不可聽觀屈苦相迎徒益勞煩父聞子語見其志固惘然失措慚愧忸怩無辭可對王曰如汝前世作國王時奉行諸善纔有小失非所憶知而尚受罪勤苦乃爾今我治國不奉正法既無微善反是逐非僑貴自恣純行危殆罪當何贖耶便放太子聽行學道太子於是棄國捐王不慕人物一心精勤念道修德功勳累積遂至成佛佛已得道復度十方諸天人民不可稱計無央數劫不以爲勞菩薩所更勤苦如是佛言爾時太子者我身是也父王者今現我父闍頭檀是母者摩耶是爾時相師婆羅門者調達是時僕者阿若拘隣五人是也諸欲爲道者皆當承順佛教無犯經戒爲道雖苦勝在三惡道八難處也違戒犯禁後墮惡道得脫爲人當生貧苦或作

奴婢願不自由奉戒行善三尊可得佛說如是諸比丘衆諸天人民莫不歡喜爲佛作禮

太子慕魄經

音釋

睽失舟切 熊羆熊胡弓切 羆獸名 波郎果切 飼草實也  
 詳更切 挽拔 拔挽無遠切 引也 酷苛沃切 仿也  
 惶仿步光切 惶不安貌 慶諸良切 麩靡爲切 舐神帶切  
 銛切 獵良涉切 穀古祿切 蚤落切